



CONVENIO DE COLABORACIÓN ENTRE A CONSELLERÍA DE ECONOMÍA E INDUSTRIA, A ASOCIACIÓN GALLEGA DE LA PROPIEDAD BALNEARIA E A ASOCIACIÓN GALLEGA DE EMPRESAS DE ENVASADO DE AGUA MINERAL NATURAL PARA O DESENVOLVEMENTO DE ACTUACIÓNS DE CAPACITACIÓN CONTINUA DO SEU PERSOAL E PROMOCIÓN DO SECTOR DAS AUGAS MINERAIS E TERMAIS DE GALICIA.

MEMORIA XUSTIFICATIVA

O director xeral de Planificación Enerxética e Minas da Consellería de Economía e Industria da Xunta de Galicia, **DECLARA:**

Que esta Consellería formalizou coa Asociación Gallega de la Propiedad Balnearia e a Asociación Gallega de Empresas de Envasado de Agua Mineral Natural o convenio arriba referido por un período de vixencia que abrangue desde a data da súa sinatura ata o 2 de decembro de 2024.

Que o instrumento convencional ten por obxecto:

Regular a colaboración entre a Consellería de Economía e Industria, a Asociación Gallega de la Propiedad Balnearia e AGAMIN para a capacitación continua do persoal e promoción do sector das augas minerais e termais de Galicia. En concreto, as actuacións obxecto do convenio son as que se describen a continuación:

ACTUACIÓNS A REALIZAR POLA ASOCIACIÓN GALLEGA DE LA PROPIEDAD BALNEARIA

a) Xornada sobre sustentabilidade ambiental: Xornada adicada aos perímetros de protección de augas minerais, así como a xestión sostible dos acuíferos.

b) Deseño e realización de dezanove placas informativas das augas mineromedicinais dos balnearios da Asociación Gallega de la Propiedad Balnearia: Deseño e realización de placas de metacrilato para colocar na entrada das áreas termais de cada balneario.

c) Deseño e impresión do folleto "Cultura Termal": Deseño e impresión dun folleto con información sobre o tipo de auga mineromedicinal de cada balneario e información das empresas.

d) Comunicación das actuacións realizadas ao abeiro do convenio: Contratación dunha empresa de comunicación para o envío de notas de prensa aos medios e divulgación das actuacións, así como seguimento de medios.

ACTUACIÓNS A REALIZAR POR AGAMIN





a) Realización do curso "Aspectos fundamentais da industria das augas minerais": O obxecto deste curso será o de informar e formar sobre o sector das augas minerais, desde distintos ángulos, tales como aspectos normativos ou calidade e seguridade alimentaria.

b) Deseño e impresión do díptico promocional das augas minerais naturais galegas: Deseño e impresión dun díptico con información das augas minerais naturais galegas, dos seus beneficios para a saúde e da importancia da reciclaxe da botella de PET.

c) Comunicación das actuacións realizadas ao abeiro do convenio: Contratación dunha empresa de comunicación para o envío de notas de prensa aos medios e divulgación das actuacións, así como seguimento de medios.

Que existe converxencia de intereses entre as entidades asinantes en aras á consecución do obxecto referido.

Que o instrumento convencional que se pretende asinar se fundamenta no seguinte:

O artigo 48.1 da Lei 40/2015, do 1 de outubro, de réxime xurídico do sector público, establece que as administracións públicas, os seus organismos públicos e entidades de dereito público vinculados ou dependentes e as universidades públicas, no ámbito das súas respectivas competencias, poden subscribir convenios con suxeitos de dereito público e privado, sen que iso poida supoñer cesión da titularidade da competencia, sinalando no seu apartado 3 que a subscripción de convenios deberá mellorar a eficiencia da xestión pública, facilitar a utilización conxunta de medios e servizos públicos, contribuír á realización de actividades de utilidade pública e cumprir coa lexislación de estabilidade orzamentaria e sustentabilidade financeira.

O Decreto 140/2024, do 20 de maio, polo que se establece a estrutura orgánica da Consellería de Economía e Industria, (DOG núm. 101, do 27.05.2024), configura esta -en adiante CEI- conforme ao Decreto 42/2024, do 14 de abril, polo que se establece a estrutura orgánica da Xunta de Galicia como o departamento da Xunta de Galicia ao cal lle corresponde o exercicio das competencias e funcións nos ámbitos de promoción e dinamización da actividade mineira e do aproveitamento dos recursos minerais. As competencias en materias de minas están atribuídas á actual Dirección Xeral de Planificación Enerxética e Minas -segundo o disposto no artigo 5 e na disposición adicional segunda do Decreto 49/2024, de 22 de abril, polo que se fixa a estrutura orgánica das consellerías da Xunta de Galicia (DOG núm. 81, do 24.04.2024)- e a este centro directivo correspóndelle, en particular, o impulso de plans, programas, medidas e incentivos económicos orientados ao desenvolvemento, á innovación, ao incremento da competitividade e á internacionalización do sector mineiro de Galicia.

A Asociación Gallega de la Propiedad Balnearia constitúese como unha entidade sen ánimo de lucro, cuxos membros son persoas físicas ou xurídicas que exercen a





actividade da Propiedade Balnearia, no ámbito da Autonomía Galega, mediante a explotación de mananciais con declaración de auga mineromedicinal, e na que figura entre os seus obxectivos a promoción e defensa da imaxe e o prestixio do sector que representa.

Por outra banda, AGAMIN constitúese como unha entidade sen ánimo de lucro, cuxos membros son empresas que exercen a actividade de envasadores de augas minerais naturais no territorio galego, e na que figura entre os seus obxectivos defender, promover e salvagardar os intereses xerais da Asociación e seus membros fronte a terceiros e a entidades ou organismos particulares e e oficiais de toda índole.

Tendo en consideración a finalidade que se persigue, a Asociación Gallega de la Propiedad Balnearia e AGAMIN constitúen as únicas entidades que reúne dous requisitos singulares e cualitativos: por un lado, ser as entidades que mellor representan ás empresas dedicadas á actividade da propiedade balnearia e a actividade de envasado de augas minerais naturais, respectivamente, por outro, ter entre os seus obxectivos, en xeral, a promoción das súas actividades o que implica o fomento do sector das augas minerais e termais en Galicia.

As actuacións obxecto do convenio responden ao interese xeral e existen razóns de interese público, social e económico que xustifican, conforme ao artigo 19.4.c) e 26.2.a) da Lei 9/2007, do 13 de xuño, de subvencións de Galicia, a colaboración da Xunta de Galicia, a través da CEI, no financiamento das ditas actuacións.

A Consellería de Economía e Industria achegará ata un máximo de **VINTE E NOVE MIL NOVECIENTOS NOVENTA E NOVE EUROS CON CORENTA E UN CÉNTIMOS DE EURO (29.999,41 €)**, con cargo á aplicación orzamentaria **39.04.734A.780.0** dos orzamentos da Comunidade Autónoma de Galicia para o ano 2024.

Que os intereses converxentes das partes asinantes exclúen o ánimo de lucro, e non poden satisfacerse axeitadamente mediante a celebración dun contrato dos contemplados na Lei 9/2017, do 8 de novembro, de contratos do sector público, pola que se traspoñen ao ordenamento xurídico español as Directivas do Parlamento Europeo e do Consello 2014/23/UE e 2014/24/UE, do 26 de febreiro de 2014.

En atención ao exposto, e a fin de dar cumprimento ao preceptuado no artigo 15.2 da Lei 1/2016, do 18 de xaneiro, de transparencia e bo goberno, estímase xustificado o recurso á sinatura do instrumento convencional que se pretende, con exclusión doutras figuras.

Santiago de Compostela, na data indicada na sinatura dixital

O director xeral de Planificación Enerxética e Minas
Pablo Fernández Vila

